

ALIM ULAMA DIMINTA MEMERHATIKAN

Rancangan untuk Malaya merdeka pada bulan Ogos tahun 1957 telah disiarkan. Ertinya di dalam 1957 pada bulan Ogos Malaya akan jadi sebuah negara merdeka. Mahaguru Kolej Islam Malaya Dr Abdul Rauf, kalau saya tidak khilaf, amaran atau pun peringatan dimanakah kelak kedudukan agama Islam di negara merdeka nanti. Adakah ia akan meliputi sebagai negara yang menegakkan Islam atau adakah ia nanti akan meletakkan kedudukan agama semata-mata pada ibadat sahaja seperti yang terjadi di timur tengah. Agama tidak lagi sebagai yang sebenarnya tetapi beragama itu diertikan kepada ibadat semata.

Selain daripada amaran yang tepat itu maka kalau kita perhatikan terutamanya di bandar-bandar di seluruh persekutuan Tanah Melayu ini kita mudah melihat keadaan masyarakat kita yang terdiri umumnya dari umat Islam, nampak benar bahawa krisi moral atau kerosakan-kerosakan akhlak di dalam masyarakat kita makin hari makin merebak dan yang demikian ini tidak ada satu ikhtiar atau satu rancangan yang tepat atau pun bersambilan untuk memerhatikan keadaan yang berbahaya kepada asas-asas keselamatan beragama di negeri ini.

Melihat kepada keadaan yang demikian itu maka sudah pada tempatnya sekarang kalau ada satu-satu ikhtiar untuk meminta pendapat dan fikiran alim ulama kita memikirkan apakah satu-satu jalan yang konkret untuk kita menghadapi keadaan masyarakat kita pada masa hadapan. Kita menganjurkan supaya ada salah seorang alim ulama yang mahu mengorbankan masa dan kebolehannya berjalan merata tempat ke Tanah Melayu untuk bertukar-tukar fikiran kepada alim ulama iaitu yang dikatakan Kaum Muda ataupun Kaum Tua dan membentangkan keadaan-keadaan yang ada di sekeliling masyarakat kita hari ini kepada mereka itu dengan

penerangan. Apakah tanggungjawab beliau-beliau itu kepada masyarakatnya dan jika sekiranya alim ulama itu mengetahui tanggungjawabnya dan mengakui bahawa ada tanggungjawab mereka kepada masyarakat yang akan datang maka diminta fikiran-fikiran daripada alim ulama itu akan cara-cara yang molek kita kerjakan. Kemudian apabila kerja-kerja itu telah dijalankan ulama yang berjalan itu hendaklah membuat suatu kesimpulan daripada pendapat-pendapat alim ulama yang jumpainya lalu membuat kenyataan terbuka, dan jika mustahak atau perlu maka diadakan perjumpaan alim ulama di seluruh tanah air untuk memikirkan perkara-perkara yang mustahak dibuat supaya dapat mereka mengikat satu kerjasama menghadapi masyarakat yang ditanggung oleh mereka kerana walau bagaimanapun mereka berkata bahawa dengan sendirinya mereka sangat besar tanggungjawabnya kepada keadaan-keadaan Islam pada masa yang akan datang.

Pihak kita berkeyakinan bahawa ikhtiar-ikhtiar ini tidak dapat dijalankan oleh pemuda yang berjiwa Islam. Langkah menjumpai ulama ini, tidak akan masin melainkan dengan datangnya dari ulama-ulama sendiri. Tenaga pemuda hanya menganjurkan kepada salah seorang atau beberapa

orang alim ulama supaya mau memberi masa dan memberi peluangnya menjumpai mereka itu. Pihak kita bersedia memberikan bantuan-bantuan menyertai rombongan ulama itu merata-rata ke tanah air dan akan memberikan kenderaan untuk perjalannya dengan belanja kenderaan itu ditanggung oleh pihak kita. Kita akan bersedia memberi masa selamanya sebulan untuk rancangan itu.

Di dalam menjalankan usaha-usaha ini mustahak diingat bahawa alim ulama itu mesti memerhatikan bahawa yang kita hadapi sekarang adalah perkara yang sangat besar, perkara yang berat yang tidak akan terpikul oleh seseorang berdua. Ia hanya akan terpikul oleh bersama dan kerana itulah perlu merancangkan rancangan-rancangan itu bersama dan dijalankan bersama-sama. Masalahnya besar dan kewajipan untuk menghadapi masalah itu, pada pendapat kita, sangat besar. Dengan itu, hendaklah ulama-ulama melupakan atau meninggalkan perkara-perkara perselisihan yang terbit di antara kita terutamanya di dalam masalah khilafiah itu.

Kita wajib ingat, melihat kepada keadaan-keadaan yang makin sehari makin rosak ini bahawa kita khususnya alim ulama akan ditanya nanti oleh Allah apakah yang telah dibuat mereka dan apakah yang telah dilakukan mereka menghadapi keadaan-keadaan yang kucar kacir masa ini. Kita akan ditanya apakah yang telah kita buat dan apakah yang telah kita lakukan dan apakah tanggungjawab kita sebagai pemimpin umat, orang yang ditanggungjawabkan memimpin umat, yang telah dibuat mereka untuk membaiki masyarakat yang kucar kacir itu.

Kita letakkan peringatan semata mata dengan tulus ikhlas supaya ada di antara alim ulama yang kenal atau yang mengenal banyak ulama di Persekutuan Tanah Melayu ini memulakan langkahnya untuk tujuan-tujuan tersebut kita borseorangan sudah tentu tidak akan dapat melaksanakan satu-satu kerja yang berkesan kepada masyarakat. Sebab itu wahai ḥaḍrat al-fāḍil alim ulama di seluruh Tanah Melayu kita meminta perhatian hal-hal

yang tersebut ini dengan berat dan apabila alim ulama tidak mahu memulakan segala langkah-langkah yang berfaedah dan sangat dijahah itu maka sudah tentu tenaga-tenaga yang ada di belakang yang terdiri menjadi tiang masyarakat yang masih mempunyai jiwa Islam yang bersinar di dalamnya tidak akan dapat dikumpulkan untuk menjalankan tugas yang diaturkan oleh alim ulama sekalian.

Sesungguhnya perkara ini telah kita cakap-cakapkan kepada alim ulama di utara Tanah Melayu dan mudah mudahan beliau-beliau yang telah kami jumpai itu akan memulakan langkahnya menjalankan kerja dengan segera untuk bersama berjalan merata-rata ke Tanah Melayu membentangkan keadaan-keadaan yang terjadi dalam masyarakat kita dan meminta fikiran kepada ulama-ulama itu apakah yang wajib dibuat dan meminta kerjasama untuk menghadapi keadaan-keadaan yang berat masa sekarang.

(Sambungan dari muka 16)

di antaranya ada yang menimbulkan was-was hati atau sangkaan-sangkaan yang tidak baik, atau putus asa. Sedang berputus asa itu terlarang dan boleh membawa kepada kufur.

Oleh kerana sangat mustahak memelihara hati dan fikiran daripada was-was yang boleh merosakkan iman dan keyakinan, maka Allah azzaa wajalla perintahkan umat Islam supaya berlindung kepadanya daripada segala macam was-was, seperti yang tersebut di dalam Surah al-Nās:

Qul a 'udhu bi rabbi al-nās. Mālikī al-nās. Ilāhi al-nās.

Min sharri al-waswāsi al-khannās. al-lādhi yuwaswisi fi sudūri al-nās. Min al-jannati wa al-nās.

Ertinya: “Katakanlah: Aku berlindung kepada Tuhan pemelihara sekalian manusia. Raja sekalian manusia. Tuhan sekalian manusia. Dari kejahatan was-was syaitan pembisik yang menunggu-nunggu kesempatan, yang membisik-bisikkan ke dalam dada manusia. Dari jin dan manusia.

Mudah-mudahan kita semua berjaya menempuh ujian puasa bulan Ramadan yang berbahagia ini dengan selamatnya.